



Här Fernand Etgen  
President vun der Chamber

Lëtzebuerg, den 4. August 2021

Här President,

Esou ewéi den Artikel 80 vum Chambersreglement et virgesäit, bieden ech lech, dës parlamentaresch Fro un den Här Minister fir Educatioun, Kanner a Jugend weider ze leeden.

An engem Lieserbréif am Lëtzebuenger Wort vum 4. August 2021 mam Titel «Eng ausgebilte Léierin ouni Schoulstonnen» freet eng ausgebilten Grondschoulenseignante, déi sech vir d'Lëscht 2 gemellt huet, an kee Posten mat fixen Schoulstonnen krut, wisou Persoune mat Enseignants-Diplom (a mat zousätzlecher Beruffserfarung) an der Walprozedur net prioritär a Betruecht gezu ginn.

Op dëser Lëscht 2, vir déi all Persoun sech kann mellen, déi den Stage de remplacement gemaach huet oder d'Ausbildung als Quereinsteiger/in wëllt ufänken, gi Plazen ausgeschriwwen déi nach net konnte besat ginn. Am Lieserbréif beschreift d'Verfaasserin, déi eng qualifizéiert Ausbildung besetzt an zu deem eng Beruffserfarung mat bréngt, datt si keng Plaz an enger Grondschoul kritt huet, wëll hier Choixen vu méiglechen Schoulen, deen si huet missen bei hirer Umeldung uginn, schonn all verginn waren. Op Nofro hin un wien dës Plazen gaange wieren, hätt si matgedeelt kritt datt fir d'éischt d'Chargé/e/s de cours mat engem CDI – och déi ouni Enseignantsdiplom eng Schoul wielen an dono d'Quereinsteiger/innen – och ouni dësen Diplom. Déi ausgebilt Enseignante wier esou ënnert déi Persounen gefall, déi als lescht dierfen wielen an well déi Plaze vun hirem Choix scho besat goufen, hätt si elo kéng Méiglechkeet an enger Schoul e Posten mat fixe Schoulstonnen ze kréien.

An dësem Kontext géif ech gäre folgend Froen un d'Regierung stellen:

- Wéi ass d'Prozedur fir des Lëscht 2 ze besetzen?
- Wéi eng Virdeeler huet eng Persoun an dëser Prozedur, déi eng ofgeschlossenen Ausbildung als Enseignante huet? Ass de Minister net der Meenung datt ausgebilten Enseignant' en missten Virrang hunn?
- Ass de Minister bereet des Prozedur un ze passen. Wann jo - wéi?

- Wéi vill nei Posten sinn dëst Joer an der Grondschoul besat ginn? Wéi vill dovunner vun qualifizéierten Enseignant' en? Wéi vill vun Quereinsteiger? Wéi eng Ausbildung haten des Quereinsteiger ?

Här President, ech bieden Iech mäin déifste Respekt unzehuelen.

A handwritten signature in black ink, consisting of several fluid, overlapping strokes that form a stylized, abstract shape.

Martine Hansen  
Deputéiert

**Äntwert vum Minister fir Educatioun, Kanner a Jugend op d'parlamentaresch Fro Nr. 4803 vun der honorabeler Madame Deputéiert Martine Hansen**

**Ad 1)**

Déi genau Prozedur vun den Affektatioune respektiv Reaffektatioune gëtt am *Règlement grand-ducal modifié du 27 juin 2016 déterminant le détail des critères de classement ainsi que les modalités des procédures d'affectation et de réaffectation des candidats à un poste d'instituteur dans l'enseignement fondamental* definéiert.

Wei an dësem Reglement virgesinn, huet dat brevetéiert Léierpersonal d'Méiglechkeet, Posten am Kader vun de Lëschten 1 an 1bis nach virun den neien Instituteur-stagiairen an de Chargé-de-coursen, Membere vun der Réserve de suppléants, ze wielen. Deemno gëtt dat brevetéiert Léierpersonal prioritär op vakant Posten affektéiert an et gëtt iwwert dëse Wee hirer Ausbildung, déi den Accès an d'Funktioon vum brevetéierten Enseignant erméiglecht huet, Rechnung gedroen.

D'Kapitel 2 vum uewe genannte Reglement definéiert och genee, wéi d'Prozedur vun der Lëscht 2 opgestallt ass.

Zousätzlech publizéiert de Ministère fir Educatioun, Kanner a Jugend (MENJE) all Joer eng Lettre circulaire de printemps, an där d'Affektatiouns- an d'Reaffektatiounsprozeduren am Kader vun den eenzele Lëschte mat de jeeweilige Stéchedatumer am Detail erkläert ginn. Dës Circulaire gëtt un d'Gemengen diffuséiert a ka vum Léierpersonal esou wéi och dem Grand public op den Internetsitten [www.men.lu](http://www.men.lu) an [www.enseignement-fondamental.lu](http://www.enseignement-fondamental.lu) consultéiert ginn.

No den Affektatioune respektiv de Reaffektatioune am Kader vun de Lëschten 1 an 1bis ginn nach vakant Poste fir déi zukünfteg Instituteur-stagiairë selektionéiert an dës ginn entspriechend dem Klassement vun de concernéierte Kandidaten am Concours verdeelt. Deemno ginn och am Kontext vun der Lëscht 2 déi Kandidaten, déi een am Artikel 6 vum Personalgesetz virgesinnenen Diplom ofgeschloss hunn, prioritär op ee Posten affektéiert. Bei dëse Posten handelt et sech prioritär ëm Titulaire de classe-Posten op enger Gemeng, fir esou een optimalen Oflaf vum Stage vun de concernéierten Agenten ze ënnerstëtzen.

Am Artikel 10 vum zitéierte Reglement ass d'Reiefolleg, an där d'Posten un d'Chargé-de-coursen, Membere vun der Réserve de suppléants, déi am Kader vun der Lëscht 2 verdeelt ginn, kloer definéiert an déi eenzel Elementer vum Klassement ginn de concernéierten Agenten transparent am Virfeld vun den Affektatioune vum zoustännege Service kommunizéiert. An dësem Kontext ginn explizitt déi Agente favoriséiert, déi d'Viraussetzungen erfëllen, fir sech dem Concours ze stellen, deen den Accès a Stage vum Instituteur-stagiaire reegelt.

Sollten no den Affektatioune an de Reaffektatioune vum brevetéierte Léierpersonal an de Chargé-de-coursen, de Membere vun der Réserve de suppléants, nach Poste fräi sinn, da kënnen dës, wéi am Artikel 27 vun der *Loi modifiée du 6 février 2009 concernant le personnel de l'enseignement fondamental* festgehalten, temporär mat Agente besat ginn, déi eng Attestation de remplacement

hunn a bereet sinn, fir dat kommend Schouljoer mat engem CDD agestallt ze ginn. Vu datt dës Agenten temporär agestallt ginn a keen zäitlech onbegrenzt Aarbechtsverhältnis mam MENJE hunn, läit et op der Hand, datt se onofhängeg vun hirer Formatioun a Funktioun vun den disponibele Posten no den Agenten affektéiert ginn, déi vun enger Feststellung profitéieren.

## Ad 2)

Wéi schonns preziséiert, ginn d'Stagiairesposte virun der Publikatioun vun der 2. Lëscht definéiert. An dësem Zesammenhang ginn Agenten, déi eng ofgeschlossen Enseignantsausbildung hunn, prioritär behandelt, virausgesat, datt si d'Konditiounen erfëllen, fir zum Stage zum Enseignant zougelooss ze ginn, dat heescht, si sech un déi festgeluechten Delaien halen, d'Preliminairesepreuvë gepackt a sech am Concours, deen den Accès an d'Funktions vum Instituteur-stagiaire reegelt, ugemellt hunn an en rang utile klasséiert hunn.

Persounen, déi dës Konditiounen net erfëllen, wann si sech beispillsweis dem Concours net wëlle stellen, hiren Diplom eréischt méi spéit kréien oder d'Preliminaires net gepackt hunn, hunn ëmmer nach d'Méiglechkeet, mat engem Bachelor en sciences de l'éducation (BScE) am Kader vum Rekrutement vun de Kandidaten mat engem Bachelor, deen a Relatioun mat engem vum den Objektiv vum Enseignement fondamental steet, ze postuléieren. An dësem Kontext gëtt vum Institut de formation de l'Éducation nationale (IFEN) fir déi concernéiert Agenten eng spezifesch Formatiounsoffer ugebueden, déi et hinne jee no Besoin erlaabt, hir sproochlech Kompetenzen ze verbesseren an/oder eng eventuell feelend Qualifikatioun nozehuelen, fir esou a sämtleche Cycle kënnen ze intervenéieren. Dës Agente gi mat engem onbefristen Aarbechtskontrakt als Member vun der Réserve de suppléants no deenen uewe genannte legalen Dispositiounen affektéiert an dës gesinn am Artikel 10 vir, datt déi Kandidaten, déi d'Sproochekonditiounen erfëllen, fir sech dem Concours kënnen ze stellen, prioritär affektéiert ginn.

No den Affektatiounen vun de Membere vun der Réserve de suppléants bleiwe gewéinlech keng Poste méi op de Gemengen opstoen, esou datt virun allem Remplacementsposten op den Direktiounen ze besetze bleiwen. Fir déi nach oppe Posten op den Direktiounen ze besetzen, kënnen Agente mat enger Attestation de remplacement, wéi am Ad 1 scho genannten Artikel 27 vun der *Loi modifiée du 6 février 2009 concernant le personnel de l'enseignement fondamental*, nach en CDD ugebuede kréien.

Vu déi vun der honorabeler Deputéierten ugeschwate Situatioun aus dem Lieserbréif, schéngt et wichteg, folgend Aspekter ervirzehiewen, fir d'Situatioun ze beschreiwen:

- Déi concernéiert Persoun huet, wéi se selwer schreift, aus perséinleche Motiver dofir optéiert, sech net dem Concours ze stellen, deen den Accès an d'Funktions vum Instituteur-stagiaire reegelt;
- Des Weideren huet dës Persoun keng Kandidatur am Kader vum Rekrutement vun de Kandidaten mat engem Bachelor, deen a Relatioun mat engem vum den Objektiv vum Enseignement fondamental steet, eragereecht, fir iwwert dës Wee vun enger Feststellung an enger Prioriséierung bei der Affektatioun ze profitéieren;

- Déi vun der concernéierter Persoun am Kader vun der Lëscht 2 kommunizéiert Choix fir eng Affektatioun op Deelzäitposten an diverse Gemenge goufen de legalen Dispositiounen entspreichend Chargé-de-coursen, Memberen aus der Reserve de suppléants, zougedeelt;
- Déi concernéiert Agentin gouf doropshi vum zoustännege Service kontaktéiert an hir gouf als Alternativ ee Remplacementsposten op enger Direktioun ugebueden. An dësem Zesammenhang ass si och au courant gesat ginn, datt Agenten mat hirem Background an dësem Fall prioritär an enger Schoul agesat ginn fir, Laangzäitcongéen ze iwwerhuele wéi beispillsweis e Congé de maternité mat engem uschléissende Congé parental, wat vun der Tâche hir no un e Klasseposten op enger Gemeng erukënnt. Déi concernéiert Persoun huet sech bedauerlecherweis dofir entscheet, dëse Posten net unzehuelen.

### Ad 3)

Déi aktuell Prozedur gesäit eng Verdeelung no klore Critèrë vir an d'Poste ginn an dëser Reiefolleg verdeelt:

- Lëscht 1/1bis: Ausschliisslech brevetéiert Léierpersonal ka fir déi publizéiert Poste postuléieren;
- Lëscht 2:
  - Prioritär ginn entspreichend dem Klassement Posten un déi Instituteur-stagiairë verdeelt, déi sech am Concours vum concernéierte Joer en rang utile klasséiert hunn;
  - An enger zweeter Phas ginn nach vakant Posten un d'Memberen aus der Réserve de suppléants verdeelt an dëst am Respekt vum Klassement, dat entspreichend de Critèren erstallt gëtt, déi am Artikel 10 vum *Règlement grand-ducal modifié du 27 juin 2016 déterminant le détail des critères de classement ainsi que les modalités des procédures d'affectation et de réaffectation des candidats à un poste d'instituteur dans l'enseignement fondamental* festgehale sinn. An dësem Kontext gëtt der Formatioun vun den Agente Rechnung gedroen esou wéi och den Dénsgschtjoren, déi an de Lëtzbuerger öffentleche Grondschoole prestéiert goufen.
  - An enger leschter Phas ginn eventuell nach vakant Posten Agente mat enger Attestation de remplacement attribuéiert.

Vu déi transparent Critèren, déi esouwuel dem Statut vun den Agenten, hirer Formatioun an de prestéierten Dénsgschtjore Rechnung droen, erweist sech eng Ofännerung vun de legalen Dispositiounen zum aktuellen Zäitpunkt als net opportun.

### Ad 4)

Fir d'Réentrée 2021/2022 goufen insgesamt 550 Posten an de Lëtzbuerger Grondschoole besat, déi sech op dës Manéier verdeelen:

- 120 Enseignanten mat engem BScE, déi sech dem Concours gestallt hunn, a vun der nächster Réentrée un an de Cyclen 2-4 intervenéieren;
- 30 Agente mat engem BScE, déi sech dem Concours net gestallt hunn;
- 150 nei Agente mat engem Bachelor, deen a Relatioun mat engem vun den Objektiv vum Enseignement fondamental steet;
- 251 Remplacantë mat engem CDD.

D'Agente mat engem Bachelor, deen a Relatioun mat engem vun den Objektiv vum Enseignement fondamental steet, déi fir déi nächst Rentrée rekrutéiert goufen, hu follgend Ausbildung:

<b>Bachelor</b>	<b>Nombre de personnes</b>
Enseignement, Pédagogie et sciences sociales	45
Langues	19
Mathématiques, Economie, Informatique	26
Sciences, Art et Sport	26
Autres	34
<b>TOTAL</b>	<b>150</b>